



Ulinzi Wetu Pekee katika

Maonjo na Majaribu

Neno lake ni taa ya miguu yangu, na mwanga wa njia yangu.—**Zaburi 119:105.**

Mungu ametupatia Neno Lake kuwa taa ya miguu yetu na mwanga wa njia yetu. Mafundisho Yake yana uhusiano muhimu mno, kwenye mafanikio yetu katika mahusiano yetu yote maishani. Hata katika mahusiano yetu ya kawaida litakuwa kiongozi mwenye hekima kuliko mshauri mwingine yeyote. Maagizo yake matakatifu ni njia pekee ya mafanikio. Hakuna nafasi ya kijamii, wala awamu ya uzoefu wa mwanadamu, ambapo usomaji wa Biblia si hitaji muhimu.

Biblia ni kiwango kikuu cha mema na mabaya, ikieleza kwa uwazi Zaidi dhambi na utakatifu. Kanuni zake zilizo hai, zinapatikana maishani mwetu mwote kama nyuzi za dhahabu, ni ulinzi wetu pekee katika majaribu na maonjo.

Biblia ni ramani, inayotunesha alama za barabarani za ukweli. Wale ambao wanaifahamu vizuri ramani hii watawezesha kusoma kwa namna ambayo watakuwa na uhakika katika njia ya wajibu wao popote watakapoitwa kwenda.

Biblia inao mfumo sahili na mkamilifu wa teolojia na falsafa. Ni kitabu kinachotufanya kuwa wenye hekima hata kuufikia wokovu. Inatuambia namna ya kuyafikia makao ya furaha ya milele. Inatuambia juu ya upendo wa Mungu kama ulivyooneshwa kwenye mpango wa ukombozi, ikitoa maarifa muhimu kwa ajili ya wote—maarifa ya Yesu Kristo. Yeye ameletwa kwetu na Mungu; Yeye ni Mwasisi wa wokovu wetu. Lakini mbali na Neno la Mungu, hatungeweza kuwa na elimu kwamba mtu kama Bwana Yesu aliwahi kutembelea ulimwengu wetu, wala elimu yoyote ya Uungu Wake, kama ilivyooneshwa kwa kuwepo Kwake pamoja na Baba hapo kwanza.

Biblia haikuandikwa kwa ajili ya mwanazuoni pekee; kinyume chake, ilikusudiwa kwa ajili ya watu wa kawaida. Kweli kuu zilizo muhimu kwa ajili ya wokovu wetu zimewekwa wazi kama jua la mchana kweupe, na hakuna watakaokosea au kupotea njiani mwao isipokuwa wale ambao wanafuata maamuzi yao wenyewe badala ya mapenzi ya Mungu yaliyofunuliwa wazi.

Neno la Mungu linachoma kila sifa mbaya ya tabia, likimfanyanga mtu kabisa, ndani na nje, likishusha kiburi chake na kujitukuza nafsi, likimwongoza kumleta Roho wa Kristo katika majukumu makubwa na madogo ya maisha. Linamfundisha kuwa thabiti katika utiifu wake kwa haki na usafi, na wakati huo huo daima kuwa mwema na mwenye huruma.

Ongezeko la thamani ya Biblia linakua kulingana na jinsi inavyosomwa. Kwa njia yoyote ambayo mwanafunzi anaweza kuigeukia, atapata kuona onesho la hekima isiyo na kikomo na upendo wa Mungu. Kwa yeye ambaye ameongoka, Neno la Mungu ni furaha na faraja ya maisha. Roho wa Mungu anaongea naye, na kisha moyo wake unakuwa kama bustani iliyomwagiliwa maji (The Signs of the Times, Juni 25, 1902).

Moyo ambao umetunzwa pamoja na kweli zenye thamani za Neno la Mungu unaimarishwa dhidi ya majaribu ya Shetani, dhidi ya mawazo machafu na matendo machafu (Youth's Instructor, Julai 28, 1892).